

Posjeta općini Ravno

09.03.2015 14:08

Direktor Federalne uprave za geodetske i imovinsko-pravne poslove Željko Obradović i pomoćnik direktora Eldin Đonlagić posjetili su općinu Ravno i održali sastanak s načelnikom općine Andrijom Šimunovićem i njegovim saradnicima. Tema sastanka je bila okončanje pilot-projekta komasacije Popova polja u općini Ravno. Sastanku su prisustvovali predstavnik kantonalne geodetske uprave Adelko Krmek, te predstavnici izvođača preduzeća „Geometrika“ i „Vinogradina d.o.o.“

Pilot-projekt komasacije dijela Popova polja obuhvatio je 101,5 hektara površine, odnosno 744 parcele i 122 posjednika. Prosječna površina parcela je bila 1365 m². Projektom je smanjen broj parcela na 126, što je za oko šest puta manji broj. Dobivena prosječna površina parcele je 8000 m².

Završena je i putna mreža, a svi posjednici su uvedeni u posjed. U procesu rješavanja komasacijskih poslova nije bilo žalbi, što je ubrzalo ukupan proces završetka planiranih aktivnosti.

Iskazano je obostrano zadovoljstvo uspješnim završetkom projekta. Članovi Općinskog vijeća općine Ravno i načelnik Šimunović su istaknuli želju za nastavkom komasacije i preostalog dijela Popova polja, što će službeno i zatražiti od federalnih nivoa vlasti. Razgovaralo se i o mogućnosti završetka započetih aktivnosti na završetku poslova izmjere i uspostave katastra nekretnina općine Ravno.